

四庫全書

史部

欽定四庫全書

江西通志卷八十五

人物 二十

廣信府

唐

方疎字仲成弋陽人景雲進士累官鸞臺侍郎開元
中封禪為禮儀使容止閒雅元宗歎其知禮封雲亭
侯

明一統志

高仁字寬仁貴溪人大厯間任福建觀察使一時名公若顏真卿輩皆託交今邑江南頭坪有高觀察墓在

馬

安志

吳武陵初名侃父勔自濮陽徙家貴溪武陵舉元和進士拜翰林學士後以事流永州時柳子厚亦以謫至因與之遊嘗稱其直而有文又曰武陵剛健士也踴躍其城鏗鏘其聲出而為之詩其見稱如此後為桂

州防禦判官

林志

按勛今編寓賢

裴璩字原明貴溪人乾符間為浙西節度使時鎮遏使
王郢等劫庫兵作亂攻陷蘇常泛江入海乘勝寇浙
西璩嚴兵設備密招其黨降之郢走死餘黨悉平後
人廟祀之

安志

王貞白字有道上饒人乾寧進士先是崔凝典文衡不
協士論上詔陸扆覆試武德殿貞白占優等授祕書
郎遭時不淑隱居教授有靈溪集行於世

林志

黃舟貴溪人數世同居元和初居父喪哭不絕聲哀毀以死朝廷賜粟帛旌表其門命州縣存問並復其

家

安志

按唐書孝友傳尚有上饒鮑嘉福虞鎔真弋陽張球李營暨子凝孫楚李植皆數世同居舊志不載附志於此

南唐

桂卿貴溪人少武勇習兵法累官銀青光祿大夫上柱

國進階司空先是數平劇寇有戰功軍中號捉生虎
子遷信州總轄時閩越邊寇卿出奇兵芟刈之數郡
民賴以寧宋開寶中李氏納土卿固守信既而得李
主手書諭以城降乃歸隱貴溪藝祖太宗嘉其賢屢
徵不起太平興國間寇復熾承詔勦平之以功拜都
尉辭不就淳化三年卒鄉人立祠祀焉慶元二年賜
廟額曰威顯諡曰忠

人物志

遂瑗貴溪人保大間仕都虞候以赤嶺功累陞司徒銀

青光祿大夫封西州侯貴溪與閩接境命瑗領兵戍境上民賴以安既没人感其功立祠祀焉目所戍之

山曰蘧嶺

同上

宋

虞肅字元卿信州人大中祥符進士初為建州司理叅軍監福建寶積場歲終當遷有司從肅求賂肅謝曰與其以賂遷吾寧困以終身也後以葉清臣薦厯遷太常丞屯田員外郎判滁州王安石誌墓

人物志

按王臨川集無虞肅墓誌林志亦不載

沈邈字子山信州弋陽人進士及第補大理評事慶歷
初為侍御史時呂夷簡罷相輔臣皆進官邈言爵祿
所以勸臣下非功而授則為濫今邊鄙屢警未聞廟
堂之謀有以折外侮無名進秩臣下何勸焉又論夏
竦陰交內侍劉從愿使從愿內濟狡譎竦外專機務
姦黨得計人主之權去矣其言甚切權鹽鐵判官轉
兵部員外郎加直史館使京東歲餘入為侍御史知

雜事未幾擢天章閣待制知澶州徙河北都轉運使
知延州卒邈疎爽有治才性少檢在廣州時歲遊劉
王山會賓友縱酒而與閭里婦女笑言無間有美才
致位通顯然以酒失自累故不能無貶焉

東都事略

應舜臣字仁伯貴溪人少卓犖不羈及長篤志向學登
慶歷進士累官太常少卿判三司極言新法不便忤
王安石出知洪州藏書數萬卷公餘披誦日夜忘疲
與文潞公曾南豐相友善卒贈金紫光祿大夫禮部

侍郎

人物志

桂詢字謀道弱冠游京師一時英俊皆相友善皇祐進士仕司理歷直講應天府右軍巡判卒於官弟冲有俊才與詢子韶齊名為時所宗稱大桂小桂政和進士

同上

葉虞仲字聖參玉山人皇祐進士通判江州持身廉謹貧甚至不給餽粥有邦人解官歸者遽置田數十頃以誇虞仲虞仲笑曰吾貧不能辦此請以二十櫃書

當之明一統志

劉輝字之道鉛山人嘉祐四年狀元調河中節度判官
祖母不習風土輝白府解官侍養詔移建康他日祖
母卒請承重府尹上其事詔下禮官議從之有宋以
來適孫有諸叔而承重者自輝始歸葬哀慕盡節州
間稱孝焉

人物志

按豫章書所載與人物志不同今別錄於後劉輝
初名幾平日好為險語歐陽公惡其壞文體欲抑

之一日知貢舉以朱筆橫抹其卷時人謂之紅勒
帛後舉歐復為主考以堯舜性之論命題得一卷
云靜以延年獨高五帝之壽動而有勇形為四凶
之誅公稱賞擢為第一唱名乃劉輝人曰此即劉
幾也公愕然久之文獻通考經籍志輝所著有東

歸集十卷

原跋

傅槩字平叔鉛山人嘉祐進士嘗為縣令當新法方行
不為委靡以奉大吏為人廉白一介不妄取

林志

許幾字先之貴溪人少以諸生謁韓琦勉入太學擢第
調高安樂平主簿知南陵縣還民之託僧尼為奸者
數百人提舉京西常平為開封府推官進至將作監
吏與匠比為姦欺凡剗削塗墍丹牘之工當以次用
而始役即概給其廩費亡藝而患不均幾逆為之程
費省工倍再還太僕卿戶部侍郎以顯謨閣待制知
渾州梁山濼多盜皆漁者窟穴也幾籍十人為保使
晨出夕歸否則以告輒窮治無脫者幾有吏幹善理

財由是四入戶部至尚書出知婺州河北都轉運使
徙成德軍知太原府張商英裁捐吏祿幾預其議貶
永州團練副使安置袁州遇恩復中大夫卒

宋史

徐紹字景昭貴溪人讀書天冠山下名著一時熙寧初
舉進士仕兵部職方員外郎孫麟瑞熙寧進士仕高

州守

人物志

陳銘字日新玉山人博學能文熙寧進士判撫州剛方
廉介不徇人私嘗以考績至都適有天變因陳親正

直遠奸佞黜賊濫凡十事皆人所不敢言者特授奉訓

大夫

安志

虞大熙肅子也任宗丞與兄大微大寧弟大沖相繼擢
第居家以孝弟聞立朝以名節顯熙寧間陳述古以
治經有行薦之經筵以備臺閣之選

林志

李封字元伯玉山人少有俊聲累舉不第奮然自陳奉
旨兩制覆試熙寧中以推恩授官晚年學益進玉山
稱鄉先生者必歸之

人物志

詹丕遠字子猷玉山人登元祐進士由校書郎除右正
言極論蔡京之奸又乞罷修造止絕諸司浮費俱切
中時弊卒為惡直者所逐晚年優游鄉里人推敬焉
子堯可知華亭縣有治聲

安志

余安行字仲勉弋陽人所居有巖如月號石月先生歷
官朝議大夫性篤孝親喪廬墓名其亭曰無盡以表
孝思所著有至言春秋新傳諸集

明一統志

葉大用玉山人紹聖間任武職金人侵汴大用從戰全

軀以歸高宗書拔身歸國節義可尚八字賜之隆興

初授京西路兵馬副都監

同上

周師原貴溪人元符進士有雋才能文辭初任將作監丞歷遷左拾遺直史館數上書言時政利病出知明

州卒官

安志

齊之禮字亨仲弋陽人元符進士靖康中為監察御史與人交初泊然若無意久乃愈親間引鄉曲子弟訓誨叮嚀本於忠厚廉介而用以和裕

林志

鄭驤字潛翁玉山人元符進士知溧陽縣歲饑民多逃亡漕司按籍督逋賦不少貸驤盡去其籍使者欲繩以法驤曰著令約二稅為定數今不除則逋愈多民多貧賦愈不辦使者不能屈時議自建康鑿河渠導太湖以通大江將破數州民田調江浙十五州丁夫所費百萬計驤條斲利病力止之通判竒嵐軍改慶陽府錢蓋自渭易熙奏辟幕下地震秦隴金城六城壞驤為盖言六城熙河重地宜趣繕治因自請董兵

護築益機灘新堡六百步以控西夏擢京兆府等路
提舉常平驤按格為常平總目十卷頒之所部高宗
初以直祕閣知同州兼沿河安撫使金將羅索犯同
州驤遣兵擊之失利金人乘勝徑至城陷驤赴井死
贈通議大夫樞密院學士諡威愍驤在熙河嘗撫熙
寧迄政和攻取建置之迹為拓邊錄十卷兵將蕃漢
雜事為別錄八十卷圖畫西蕃西夏回鶻盧甘諸國
圖書為河隴人物志十卷序贊普迄溪巴溫董璫世

族為蕃譜系十卷

宋史

張叔夜字耒仲永豐人者之曾孫先世家開封叔夜由錄事叅軍以破賊功加龍圖閣直學士知青州靖康初金兵過河叔夜乞遣精騎邀擊及豫令河北邊鎮出兵斷其歸路并力追襲不報徙南道都總管帥師入援或勸緩行叔夜曰國家危難如此忍顧身乎至京入見請駐驂襄陽以圖幸雍擢拜僉書樞密院事提舉南道兵守禦城上連日大戰士皆殊死鬪斬其

金環貴將二人身被創猶父子力戰金既議和命彈
壓京城事欽宗再出郊叔夜叩馬諫止不能回號慟
再拜欽宗回首字之曰嵇仲努力會金詔立異姓叔
夜抗論宜立皇太子為君以從民望金不從遂扈駕
北去至白溝河矍然起仰天大呼扼吭而卒年六十
三訃聞贈開府儀同三司諡忠文建炎紹興間葬衣
冠於積寶院之西詔有司即墓立廟賜額旌忠

東都

事略林志合撰

按宋史張耆祖孫列傳不言遷居江西林志明一
統志宋名臣言行錄皆以為永豐人南康志又以
為星子人今從林志采東都事略合撰又考朱子
旌忠愍節廟碑言忠文即墓為祠僻在永豐靈鷲
深山之中立廟賜名著有祀典確有可據前志乃
云事出流傳無徵不信豈朱子之言不足徵耶

余應球字國器安行子崇寧進士授校書郎靖康初言
和戰不可偏廢又言新政有四大失欽宗親擢為御

史應球感激知遇在職三月章六十餘上忤權幸以吏部員外郎出為部使者親喪遂不復仕著有真隱

集并奏議

林志

施舜顯字彥光永豐人大觀中上舍第累官提舉江西路茶鹽常平使東牟王右史謂其以仁義篤於躬雖位不稱德而聞風者悅之其子炳卿亦有文集

同上

桂南昇字志和貴溪人政和進士靖康之變金人欲立異姓莫儔等傳尼瑪哈意在張邦昌南昇於廣會叱

莫儔曰汝嘗作大魁乃如此舉措不愧後世清議耶
又移書喻邦昌亟反正毋陷天下大戮邦昌大沮遂
遣謝克家迎康王於濟州王即位嘉南昇忠謹特擢
吏部員外郎尋知惠州兼本路安撫使為政簡靜民
心宜之仕至朝請大夫

人物志

毛泰亨字文亨貴溪人政和進士仕國子博士宣和初
龍見京師城外水高丈餘泰亨上封事極論闕失會
起居郎李綱貶官遂致仕歸家杜門掃軌以讀書自

娛號鈍翁

同上

余公瑞字鎮臣安行姪政和中特奏名為邵武尉歲饑
請常平粟不報即自發之民賴以濟咸稱之曰余父
弟公彥由鄉貢告歸養親親沒負土為墓作白雲亭
以致其思

林志

余堯弼字致勲上饒人政和進士授祁門令務以德化
人民服其德量指邑之祁山曰雖昇是寘公腹中不
礙也累官簽書樞密院事叅知政事嘗使金專對有

體金主憚之未幾乞解機務脩然林下與漁樵伍忘

其貴且齒云

府志

徐中行字元立上饒人政和進士唱名日自陳其父年
八十九願以所應得官回授上曰此可厚薄俗詔其

父別以官名命之

林志

周世修字純德玉山人宣和進士知興國縣有平盜功
簽書建康府錄諸將園田之逋欠者都督府以民居
侵冒市衢撤令撤之世修拒弗聽子師清字畏知為

藏州發源縣令好學有文

人物志

陳康伯字長卿弋陽人宣和中上舍丙科累遷太學正
丁內艱貴溪盜將及其鄉康伯起義丁逆擊俘其渠
魁邑得全建炎末通判衢州攝郡事盜發白馬原康
伯督州兵濟王師進討克之高宗駐蹕建康除樞密
院大計議官累遷司勳郎中康伯與秦檜太學有舊
檜當國康伯在郎省五年泊然無求始遷軍器監金
使至詔康伯館伴以事論罷知泉州垂十年起知漢

州召對除吏部侍郎首請節用寬民凡州縣取民無
藝許監司互察臺諫彈劾尋無禮戶刑三部前此有
司希檣意興大獄康伯平讞直冤士大夫存沒多賴
之除吏部尚書尋拜叅知政事以通奉大夫守尚書
右僕射同中書門下平章事明年三月拜尚書左僕
射五月金遣使賀天中節出嫚言求淮漢地措取將
相大臣且以淵聖凶問至康伯主禮部侍郎黃中之
論持斬衰三年先是葉義問賀允中使還言金必敗

盟康伯請早為之備金犯廬州中外震駭朝臣有遣家豫避者康伯獨具迎家人來浙人恃以安敵迫江上有勸上幸越趨閩者康伯奏曰審爾則大事去矣於是降手詔親征會金帳下變作一夕遁去孝宗即位兼樞密使尋乞休致加少保封信國公北兵再入淮向人情驚駭咸望康伯復相上出手札即家居召之拜尚書左僕射進封魯國公康伯力疾就道兼程以進至闕下詔子安節壻文好謙掖以見減拜賜坐

間日一會朝許肩輿至殿門非大事不署敵師退尋
以目疾免朝謁丐歸章屢上不許一日出殿門喘劇
輿至第薨年六十九贈太師諡文恭慶元初配孝宗
廟庭改諡文正

宋史

按文正有集三十卷今止傳疏十餘篇表誥數篇
而已

鄭進古字時述貴溪人大觀進士仕武選員外郎有詩
文三十卷名鳴鶴集朝散郎宋昭序之

人物志

張憲貴溪人武力絕倫紹聖初選為博興巡檢方臘寇陷兩浙憲募勇士千人兼程以進賊懼引退遂復衢州未幾金掠滑州即馳赴之既瀕河會橋斷不克渡至亳州聞駕北狩欲邀截而不能乃趨兵濟南謁高宗因薦文武全才堪為將相者七人以李綱宗澤為首拜武義大夫江南東路軍騎總管久之江東妖賊王則大熾憲走上饒會兵進討兵未集為賊所陷與其子琳死焉事聞贈武功大夫官其兩子

林志

張運字南仲貴溪人宣和進士調桂陽監遷潭州攸縣尉高宗南渡劇賊王在據岐山潭帥徵兵戍岳運將二千人先至岳賊平改新淦丞攝縣事運撥煨燼考版籍正租賦數月之間弊除而民定紹興五年通判鼎州賊楊么黃誠率輕銳徑趨武溪南興以臨鼎州城中大震運與太守程昌寓勒兵登城控扼上下以張其勢賊宵潰澧賊雷德進柵險稱亂帥檄運討之運將都統梁吉等率兵直擣其巢破四十二柵降其

衆移貳濡須金人侵廬壽等州大將駐兵淮壖以拒之運給餉未嘗乏絕歲餘以親老還江東寓居鄰召入除知達州方大旱入境而雨奏除民病五事召為度支郎中陳諸路綱運七弊懲革十術遠近遞輸以均勞逸事皆施行兼樞密院檢討尋改大理少卿明於治獄獄為之空拜刑部侍郎兼權戶部侍郎金人渝盟特遷戶部侍郎以專餽餉丞相陳康伯議遣李寶自四明控制海道衆論紛紜運直入贊決以戰為

上策金人果敗走從上勞師江上及還請補外乃授
集英殿修撰出知太平州孝宗既受禪運亦請老以
敷文閣待制提舉江州太平興國宮尋授廣東經略
不赴乃復祠祿鄱大饑運首發粟二千石以振之自
是民爭出粟以濟卒贈少師左光祿大夫

宋史

周執羔字表卿弋陽人宣和進士廷試第二除太學博
士建炎初從隆祐太后於江西還覲會稽尋以母疾
乞歸就養調撫州宜黃縣時四境倣擾潰卒相挺為

變執羔執首謀者斬以徇邑人德之繪像立祠改秩
通判湖州召為將作監丞遷太常丞擢權禮部侍郎
充賀金生辰使兼吏部侍郎請賜新進士開喜宴於
禮部從之軍興廢此禮至是乃復以忤秦檜被劾罷
起知眉州改夔州兼夔路安撫使尋除敷文閣待制
禮部侍郎拜本部尚書在經筵二年每勸上以辨忠
邪納諫爭明年三月告老上諭曰祖宗時近臣有年
踰八十尚留者卿之齒未也命却其章閏月復申前

請詔提舉江州太平興國宮卒年七十七

宋史

方疇字耕道弋陽人建炎進士紹興初上書謂金人詭計盜賊猖獗藩鎮跋扈將帥專恣為四宜憂講征伐理財用擇人才明賞罰重臺諫抑閹寺議詔令恤凶荒訓民兵寬民力為十宜行其一宜去謂時宰也後通判武岡軍郡守李若樸希時宰意告疇與胡銓為姻家中以深文貶零陵先是張魏公亦謫是郡疇因從其父子遊後判建康以疾終於官有文集二十卷

林志

方思尹字民瞻弋陽人紹興中知太和縣監察御史田如鼇持節臨部一見如舊曰君廊廟人也豈久居此乎章貢兵亂先聲欲直擣廬陵思尹編木為柵狀如鹿角橫截江流民心以安在邑六年參政董德元薦於朝拜左司郎中奏減油麻折苗之稅後遷鄂州總領廣西江西提點刑獄以老辭

豫章書

楊抗字抑之上饒人以身畧薦用嘗知盱胎紹興辛巳

之役為淮西運使錫山尤袤為著事實子恂字信伯

登進士第文學推重於時

人物志

施師點字聖與上饒人十歲通六經十二能文弱冠游太學舍選奉廷對調復州教授陳康伯薦賜對兼權禮部侍郎除給事中時太子詹事已除上又特令增員為二命兼之假翰林學士知制誥使金致命金廷立班既定相儀者以親王將至命師點退位屹立不肯少動使還除端明殿學士兼參知政事同知樞密

院師點嘗同宰相奏事退復同樞密周必大進呈上
曰適一二事卿等各陳所見甚闊大體前此宰相奏
事執政不措辭今卿等如此深副所望除知樞密院
事以資政殿大學士知隆興府江西安撫使薨年六
十九有奏議十卷制藁八卷東宮講議五卷易說四
卷史識五卷文集八卷

宋史

申世寧信州鉛山人紹興六年潘達兵襲鉛山父愈年
七十未及出戶遇賊賊意其有藏金欲殺之世寧年

未冠亟引頸願代父死賊感其孝兩全之

同上

傅績字子玉鉛山人嘗應進士舉時青苗法行縣多繁
逋績悉捐資代輸盡得釋里閭皆稱長者紹興初潘
逵寇信兵焚掠至其家三舉火不燃首領後至曰是
傅長者家不可犯斬舉火者而去

人物志

徐珣字溫甫上饒人高宗朝進士授辰州教官為刪定
編修轉池州判官有美政尋致仕所著有語孟解易

解學者多宗其說

林志

周欽若鉛山人累世業儒初有聲三舍間不就祿仕積書教子數世同居慶元中旌其門

同上

詹叔善字繼道玉山人紹興進士拜奉議郎諸王教授滿歲即求致仕壽皇嘉之特官其子復賜諱有知止足勵士風之語先時叔善築書屋榜曰知止與詔語合人多題詠之其昆弟叔寧叔迴叔沄叔義俱第進士

人物志

詹叔義字仲和叔善弟紹興進士又中博學宏詞科所

著有拙齋文集二十卷詩集五卷狂夫論六卷

同上

桂績字彥臬紹興進士仕處州司法終武昌判居官廉平所著有溪南集二十卷弟績字彥成紹興乙丑及第任沅江令終浙西運幹著有類左傳十六卷節唐書五十卷

同上

按林志所載與此全不相同

韓大寧字孝先玉山人紹興進士嘗著續百將傳周易集註知饒州德興縣累有惠政終於官袁正肅公題

其墓曰純孝先生之墓 林志

徐仁

一作人

傑字漢英玉山人紹興進士趙忠簡鼎深器

重之後陞對惟以復讐恥清境土為言遂忤秦檜請
祿祠歸所著有檀弓傳易傳春秋發微 人物志

王時敏字德修上饒人學有源流無該體用嘗從呂東
萊遊所著師說語孟中庸大學說并雜文若干卷 同上

徐椿年字壽卿永豐人紹興進士任宜黃主簿以承奉
郎致仕從張九成學所著有尚書本義論語解雙溪

集
林志

汪喬年字房孺玉山人紹興五年以特奏名進士對策
第一臨事接物一以誠信少以文學顯晚以齒德尊
人物志

祝可久字德父鉛山人初從劉子羽立功西陲父歿不
仕與弟可大設鄉塾以訓學者又為義莊以濟族之
貧者從兄某出仕高安夫婦繼亡男女俱幼可久馳護
以歸
府志

余畢字克成玉山人紹興五年釋褐嘗知和永二州其
在太學四方稱為善類所居學者漸漬薰陶涵育成
就其為政簡而豫不表暴不詭隨雖以道自信而務
盡人言

林志

趙汝濱字文浩鉛山人嘗知南城縣盜發南豐郡以屬
汝濱盡釋其脅從人德之通判建昌軍攝軍事值盜
起鎮撫不遺力忌者反以為言遂杜門不復出任人

物志

汪涓字養源應辰之兄也踐履篤實有古君子風登進士第為中書舍人與應辰同處禁塗時稱二汪

同上

汪應辰字聖錫信州玉山人紹興五年進士第一人年甫十八初名洋特改賜應辰上欲即除館職趙鼎言且令歷外任養成其材乃授鎮東軍簽判鼎為帥幕府事悉諮焉召為祕書省正字時秦檜力主和議金人欲以河南地歸我應辰上疏謂和議不諧非所患和議諧矣而因循無備之可畏臣願勿以和好為無

可虞而思患預防常若敵人之至疏奏秦檜大不悅
出通判建州遂請祠以歸寓居常山之永年院益以
修身講學為事張九成謫邵州交游皆絕應辰時通
問及其喪父言者猶攻之而應辰不遠千里往弔通
判袁州凡所予奪人無異詞丞相趙鼎死朱崖扶喪
過郡應辰為文祭之檜死召為吏部郎官遷右司母
老乞外出知婺州尋丁內艱服闋除祕書少監權戶
部侍郎三十二年建儲以孝宗名與唐廬江王晉楚

王同詔改為曷應辰以為與唐昭宗同白左相陳康伯遂改今名集議秀王封爵應辰定其稱曰太子本生之親暨內禪擬於傳位日降赦應辰言唐太宗受禪於高祖明年正月始改元乃從其說又議改元重熙應辰謂契丹嘗以紀年遂改隆興一朝大典禮多應辰所定議乞補外知福州未幾升敷文閣待制舉朱熹自代在鎮二年會朝廷謀蜀帥乃以敷文閣學士為四川制置使知成都府既至免利路民餉運徙

沿邊戍兵就糧內郡縱保勝義士復業存左藏所解
白契二百萬以備不虞奏行之吳璘時駐蜀口武
興精兵為天下冠璘死應辰遂攝宣撫之職蜀道晏
然入覲陞對以畏天愛民為言尋兼翰林學士應辰
在朝多革弊事中貴人皆側目力疾請祠自是卧家
不起少從呂居仁胡安國游張拭呂祖謙深器許之
子達仕至吏部尚書端明殿學士

宋史

陳文蔚字才卿上饒人朱子門人著書立說深得旨趣

朱子與手書往復互相論正所作州學修禮器記亦
推尊朱子儀式而損益焉

林志

蔣夔字子莊永豐人河南伊縣令紹興間嘗中文科復
充制選其所與遊皆一時名士所著有論語孟子周

易解合二十七卷

同上

劉允迪字德華玉山人隆興進士知德安縣為政一本
儒術以惠愛得民累官至朝奉郎叅議沿海制置司
軍事後居家建義學以教族子弟及鄉人之願學者

豫章書

按朱子集有玉山劉氏義學記為允迪而作也

徐子融不詳其名鉛山人朱子與蔡季通書云鉛山徐子融老成有守嘗作小學欲延之家塾為諸子師範云

朱子集

汪達字季路應辰子乾道進士官國子司業韓侂冑用事斥偽學善類皆不自安劉德秀因乞考核邪正真偽所逐多名士達入劄子辨之德秀以達為妄言并

斥之閑居七年叅政李璧力言於朝嘉定初召為太常卿累遷至吏部尚書

人物志

周憲字可則永豐人從東萊呂舍人遊集所聞為震澤語錄曾文清子仲躬跋其後

府志

盧孝孫號玉溪貴溪人嘉泰進士仕西安丞擢知玉山陞太學博士淳祐初上適太學御講筵孝孫退而獻所編四書集義上善之既而上於中瓦建龍翔寺祀感生帝孝孫因上時相書極言其不能格君非心即

挂冠歸閑門授徒累召不起學者稱為玉溪先生人

物志

韓補字復善玉山人與兄祥同登嘉定癸未進士知徽州為政廉明尋除淮西總領遣使南邦還對稱旨在朝疏奏以切直忤時宰出知太平治尚清靜民皆安之祥字履善好學嗜文累官吏部侍郎兄弟皆宗程朱之學世稱二韓理宗御書翕和堂以榮之

同上

按補知徽州作書院請祠朱子得賜額紫陽事見

林志

周端禮字應和永豐人充金國慶賀使金主聞使至輒
伏盜剽劫禮幣然後以使者失職起釁端禮及境察
知其事乃遷幣他所夜果邏舟數十問宋使者何在
無所得黎明募壯夫倍道至金金主弗知令判使索
書幣甚亟端禮具以進金君相相顧失色贈遺甚厚

林志

蔣傳永豐人慶元初韓侂冑欲逐趙汝愚而難其名京

鍾曰誣以謀危社稷則一網打盡矣侂冑乃使右正
言李洙以誣論罷之國子祭酒李祥司業楊簡力辨
其非亦被斥傳時為太學生與同舍生楊宏中等六
人伏闕上書白汝愚之忠勤辨祥簡之非黨請竄洙
以謝天下還祥簡以收士心疏上上以其扇搖國是

編管五百里外

同上

趙不過直祕閣登進士為清湘令無異韋布嘗置兼濟
倉冬糴夏糶閭里德之繪像祠焉

同上

葉夢得號是齋貴溪人由進士授秘書丞建石林書院
與盧玉溪陸梭山等講學其中有著述行於世

人物志

余大雅字正叔上饒人德性和粹器量宏遠聞晦翁講
學閩中毅然往師之晦翁嘉其勤平居問答僅存語錄

刻於江東庾臺

林志

趙善邨信州人以宣教郎知崇安縣事政尚嚴明人號
趙鐵面紹定中汀州寇亂邑當孔道供億軍需不擾
而辦民甚德之

人物志

鄭芝秀號月山貴溪人進士及第仕未顯而卒族子會
號亦山仕至禮部侍郎理宗愛其才手書門帖賜之同上

徐元杰字仁伯上饒人幼穎悟誦書日數千言每冥思
精索聞陳文蔚講書鉛山往師之後師事真德秀紹
定進士及第簽書鎮東軍節度判官召為祕書省正
字遷校書郎奏否泰剝復之理請外不許遷著作佐
郎無兵部郎官以疾辭差知南劍州會峽陽寇作擒
渠魁八人斬之餘釋不問母憂去官免喪授左司郎

官兼崇教殿說書拜將作監時天久不雨轉對極論
洪範天人感應之理及古今遇災修省之實辭益忠
懇丞相史嵩之丁父憂有詔起復中外莫敢言元杰
言陛下為四海綱常之主大臣身任道揆扶翊綱常
者也自聞大臣有起復之命雖未知其避就若何凡
有父母之心者莫不失聲涕零是果何為而然人心
天理誰實無之臣懇懇納忠何敢詆訐特為陛下愛
惜民彝為大臣愛惜名節而已疏出朝野傳誦未幾

兼右司郎官拜太常寺卿國子祭酒權中書舍人杜
範入相復延議軍國事所言皆朝廷大政邊鄙遠慮
每裁書至宗社隱憂處輒閣筆揮涕書就隨削藁雖
子弟無有知者六月朔輪當侍立以暴疾謁告特拜
工部侍郎隨乞納祿詔轉一官致仕卒太學諸生伏
闕懇其為中毒獄迄無成海內人士傷之賜諡忠愍
宋史

黃從龍永豐人嘉定進士為郢州推官元兵入襄峴郢

當要衝守將潛遁從龍抱印登城大呼曰張巡許遠
之事正在今日齧指血書死戰報國四字與子熙力

戰而死

林志

謝徽明枋得伯父也以特奏恩為當陽尉攝縣事時天
基節上壽元兵奄至徽明出戰死二子趨進抱父屍
亦死

人物志

韓觀國字用賓景定進士授潭州錄事元兵下江南頓
師堅守不下凡閱月城陷死之

同上

周天驥字子德永豐人淳祐進士授校書郎嘗從真文忠公學文忠為作穎齋為學二記勉之同上

徐珏字叔寶上饒人寶祐間餘干令每決疑獄人稱神

明林志

謝枋得字君直弋陽人寶祐丙辰試中禮部高等比對力詆時宰閹宦抑置二甲第一人召試教官調建寧府教授趙葵宣撫江東西辟為屬尋除兵部架閣令募兵援江上出楮幣十萬貫得信撫義士數千人以

應賈似道當國會軍興出入簿責任事者坐廢至元
初長星竟天踰月元師壓江上宋社日替江東漕司
猶試士徵校藝坊得憤賈竊政柄害忠良誤國毒民
發策十問辭甚剴切大拂賈意臺評竟上謗訕鐫兩
秩興國軍安置因謫所之山自命登山守令皆及門
執弟子禮丁卯以史館召不赴乙亥授江東提刑總
其兵以守饒信撫與元兵戰輒敗遂易服負母走閩
中隱於卜信守將悉捕公妻子弟姪送建康獄夫人

李氏有容德有廉帥者欲妻之一夕自經死弟君烈
君澤侄某某及一女二婢皆死獄中惟二子熙之定
之移獄廣陵得釋又有弟禹在九江亦不屈斬於市
至元二十二年侍御史程鉅夫以宋遺士三十人薦
於朝枋得在舉中被徵丁內艱辭亡何連召皆不起
二十五年春正月福建行省魏天祐被旨迫促上道
乃行夏四月至京師不食死年六十四門人私諡文
節先生平日所著易書詩三傳行於世雜著詩文六

十四卷翰林學士盧摯為之序坊得死後二十四年門人虞舜臣率其徒築室買田祠於弋陽之東江浙行省請於朝為疊山書院

元李道源所撰謝公神道碑

按宋史謝傳與道源所撰文節先生神道碑不同者凡數處傳云吳潛宣撫江東西碑以為趙葵傳云程文海薦宋臣二十八人碑以為三十人傳云二十六年四月至京師碑以為二十五年碑云信之守將悉捕公妻子弟姪送建康夫人李氏自經死

弟姪及一女二婢皆死獄中又其弟禹在九江亦
不屈斬於市所著易書詩三傳雜著詩文六十四
卷史傳皆不載竊疑作元史時未考此碑也今悉
以碑文為據

原跋

郭青螺曰文節之謚集以為私謚鄭汝璧臣謚類
鈔以為景泰年謚未知孰是

徐炎午永豐人疊山高第也景定進士授行軍器監簿
添差建寧府通判有美政建人頌之

人物志

宋儒字希淳貴溪人嘉定進士仕大理評事上書陳安

內攘外事宜執政惡其切直調迪功郎卒於官

安志

趙善鄒字國用鉛山人嘉熙四年知東莞縣節用愛民

科徵或不給則捐囊代輸剖決如流稱神明宰初李

巖築堤護田自姚令孝資後莫有繼者善鄒修舊堤

萬五千九十丈視地患水者復堤之事竣歡聲載塗

比去民思之不置

粵東名宦志

余琰字伯華永豐人淳祐進士授廣東提刑持己廉潔

當時之廉吏碑琰居其一同上

王小十鉛山人母疾割股以愈之知州葉三省奏乞旌表門閭改易鄉號仍宣付史館詔悉從之以所居紫溪鄉改旌孝安志

按安志與小十同時尚有同邑尹孝子韓洙永豐周溫叔俱以孝義聞于時為附錄備考

邵士英字子實貴溪人淳祐進士理宗朝官翰林檢閱不阿權貴為賈似道所扼退居鶴嶺構精舍日與弟

子講學其中及卒江丞相萬里謚曰介隱先生

府志

桂璧貴溪人領江西漕薦授蘄州判北兵寇蘄太守徐
昇逸去璧申明大義率城中民日夜捍禦敵不能犯
踰旬乃出奇兵擊之圍遂解尋以舉薦授南昌節推
安志

桂子恭字伯允貴溪人以破蔡功授瑞州都監謝枋得
貽書文天祥曰子恭忠銳沉鷺許國馳驅志大而任
不稱尋從孟洪朝陵寢洪閱其行橐惟習氣說一帙

洪入朝奏其忠潔遷洪吉臨三府都延使授成忠郎

卒

同上

程魁號玉巖貴溪人應嘉熙庚子貢寶祐丙辰伏闕上書咸淳中乙科授從仕郎臨汝教授德祐乙亥以承

直郎禮兵部架閣杆鄉郡紫陽方回表其墓

同上

周日章字文顯永豐人自信甚篤窮不易操嘗慕王貞白之為人友人趙蕃名其詩曰靈溪後集以貞白嘗

有靈溪集也

林志

趙蕃字昌父其先鄭州人大父賜提點坑冶家信之玉
山蕃以致仕恩調浮梁尉連江簿皆不赴為泰和主
簿受知於楊萬里理宗即位特改奉議郎直祕閣又
辭奉祠致仕卒年八十七蕃五十時猶問學於紫陽
既耄命所居曰難齋景定三年祕閣修撰鄭協等請
諡乃諡文節

豫章書

按趙蕃學者稱為章泉先生所著有章泉集

王奕號伯敬玉山人為邑博與其子介翁居玉那峰讀

書其中素與文文山謝疊山友善及疊山就執北行
送之有詩云兩生無補秦興廢一出仍關魯重輕白
骨青山如得所何須兒女哭清明詞旨激烈宋亡建
斗山書院居之杜門不出所著有東行藁

人物志

徐宗仁字求心永豐人淳祐進士官國子監主簿開慶
元年伏闕上書極論邊事又論董宋臣盤固日久蒙
蔽日久又請使有言責者皆得盡其言累遷考功郎
兼崇政殿說書國史編修實錄院檢討德祐元年授

吏部侍郎中書門下檢正諸房公事權禮部尚書兼
益王府贊讀衛益王走海上厓山敗死焉

豫章書

元

桂本字林伯貴溪人隱居不仕講明象山陸氏之學創
靈谷書院著述其中所著有四書通義五經統會三
極一貫圖金精鰲極類纂道統銘等書

王文忠公集

祝堯字君澤上饒人博學能文延祐進士授南城丞改
江山令陞萍鄉州同所著有太易演義四書明辨策

學提綱古賦辨體

林志

卷八十五

楊仲弘玉山人第進士任翰林編修能詩文號百戰健

兒同上

李纘爵里失考顧瑛玉山草堂集有弋陽山樵李纘序

一篇當是弋陽人

見玉山草堂集

楊亮字叔明上饒人元高士也與錢惟善為友子觀至順二年進士為翰林檢閱卒錢惟善楊隱居挽詩有身入波濤親在念恩沾雨露子登科之句載江月松

風集

揭文安公集

方南一貴溪人疊山高第也延祐間任饒州教授耿介不羣卓於樹立遷贛州判官所至有賢聲人物志

劉光字自謙上饒人延祐進士授翰林編修少承家學一時名士爭與之游稱之曰泉山先生祖養拙受學黃勉齋得居敬窮理之要號白石先生光因創白石書院祀朱文公而配以勉齋又建義塾買義田以贍鄉子弟之來學者朝廷嘉其行誼旌表其門

同上

張宏綱貴溪人早負才名歷官集賢院大學士榮祿大

夫柱國封信國公諡安惠

林志

黃叔樵弋陽人博學能文善楷書嘗分教邑庠以足疾辭歸授徒於鄉為後學所宗與兄孟耕處友愛尤篤居家嚴禮法禁絕佛老之教

同上

方思廣字可大上饒人至正三年知連州增學田立義塚勤撫字吏卒無敢恣者既去士民紀績學宮至今

尚存

廣東名宦志

江彥章貴溪人元末不仕偽將王溥聞其名欲鉤致之
不可得乃以兵縛之行至何郎橋厲聲罵不絕遂遇
害土人瘞其屍次日雪封之莫識其處至今人呼曰

江家山云

府志



江西通志卷八十五

欽定四庫全書

史部

江西通志卷八十六

詳校官監察御史_臣范衷

檢討_臣德生覆勘

總校官知縣_臣楊懋珩

校對官編修_臣沈清藻

謄錄監生_臣王永鎮

欽定四庫全書

江西通志卷八十六

人物

廣信府

明

陳修字伯昂上饒人從平浙東授理官援引律令悉本
寬厚盡改元季竒政擢兵部郎中遷濟南知府濟南
屢經兵燹比戶彫殘且多衛將練兵屯田其間修至

調劑有方兵民相安洪武四年拜吏部尚書六部之
設自洪武元年鎮江滕毅首長吏部一切選除考課
法制猶未畫一修偕侍郎李仁詳考舊典參以時宜
按地劇僻為設官煩簡凡庶司黜陟及課功覈實之
法皆精心籌畫銓法秩然未幾卒官

列卿錄

按林志人物志皆以修為弋陽人

余德讓永豐人元季之亂德讓率義旅保障鄉邑明初
舉賢良歷官知池州時浙西初平命簡郎官有才猷

者往叅閫務德讓拜行省郎中區處安輯悉有條理
以信州隸浙漕運不便詣闕陳其所宜遂改隸江西
民深德之子英以人材舉同知力行惠政有父風人
物志

白天民鉛山人洪武初以明經任本邑訓導教人有方
御史葉孟芳薦之曰學精德邁智慮過人才堪大用
召至京師授廣東肇慶知府政績著聞

明一統志

張率字孟循貴溪人洪武初知嘉定州上海民錢鶴臯

作亂入城據之率被執不屈囚繫松江獄先是朝廷
命俞平章守太倉聞嘉定失守遣兵來援會大軍平
松江率得還俞素聞率賢曰幸公毋恙願聽約束不
敢擾州民也民賴以安及罷任去老少皆為之涕泣
人物志

按張率所著有張嘉定集

何敏中貴溪人洪武中以才行卓異任祁門知縣上書
言時政得失朝廷嘉之遣行人賜以樽酒擢徽州府

知府後轉嘉興府所至有政聲

明一統志

游志遜上饒人洪武間以蔭授廣西興安丞入朝應制賦詩擢御史舉劾不避權貴太祖稱為忠直御史尋

陞四川僉事

林志

葉璣字璣玉貴溪人任金華月泉書院山長陞婺學正至正丁亥明太祖取婺州置行省中書召儒士許元等十一人入直省中講論經史數陳治道而璣首被選將大用之以病歸卒所著有石坡集孝經衍義廣

信先賢傳子孝友以文學世其家人物志

徐觀道上饒人洪武初以文學赴召試天地廟社山川鬼神諸論稱旨授翰林院檢討署吏部考功郎中乞骸陛辭上稱之曰善人有遺文若干卷藏家

同上

李耕字原堃貴溪人以三禮舉進士授仁和令官八月而卒性穎敏六歲能詩十歲通羣經金華宋景濂鄱陽蔡淵仲皆稱之為一代奇才弟造字原深以春秋舉進士丞古田有宦績

同上

吳從敬貴溪人洪武初以薦授晉府長史所著有康衢集小學訓義詩集大成古文孝經集義傳於家

同上

周彌瞻字景顏永豐人洪武初由明經授本縣教官尋擢祠部郎嘗奉勅撰郊廟碑文未幾請老上以清秩處之調國子學錄入為王府教授終於官所著有虛

齋集

同上

龔敷鉛山人洪武初以明經任府學教授御史葉孟芳高其行薦至京師遷國子司業尋陞祭酒卒於官

林志

按龔穀所著有爲湖集

王自牧上饒人洪武間以人材用歷官至兵部職方司

郎中永樂三年從英國公出征交趾卒於軍

人物志

楊廣仁上饒人永樂間任虞城縣令百廢具興雨暘應

禱嘗以累繫獄百姓相率詣闕白其寃得釋及卒老

稚遮迎其喪泣送者千百人

林志

俞孟芳字世賢永豐人幼爲葉氏後冒其姓明初以貢入太學授東阿諭陞御史出按山東法紀嚴明墨吏

望風改轍既按陝以言事謫鄭州倅尋復職嘗薦白

天民龔敷學行于朝帝嘉其所舉歷僉都御史卒

府志

王增祐字永吉貴溪人由進士授御史歷陞副使嘗兩
錄重囚辨死罪以下三百餘人進廣西按察使論奏
總兵田真賊罪寘於法土官黃珰奪嫡殺本支七人
增祐以聞收珰繫之獄珰度不可免潛結近侍以請
易樹子合上意即命馳傳赴闕擢居督府增祐撫膺
長歎曰所不能誅此逆賊復可與同立於朝乎遂解

組歸人物志

裴德澤貴溪人進士由庶吉士改授侍御史宦寓不攜家服食簡約如寒素出巡福建風裁大著後以言事

謫交趾居三年遂棄官歸

同上

吳添麒字廷瑞弋陽人永樂進士仕禮部嘗奉使東魯閩楚諸大藩清聲昭著中外

明一統志

李奎字文耀弋陽人正統間擢御史按浙江蘇松諸郡以揚文貞薦督京畿學政舉儒士黃輔等五十餘人

分主師席士習丕變陞大理寺丞遷右少卿未幾致仕歸所著有詩經辨疑九州集歸田錄子玘任御史

陝西副使

林志

王受字謙益玉山人由舉人監察御史陞廣西僉事景泰初土賊韋萬秀攻掠慶遠亟受以兵破之尋致政

歸

林志

邱旭鑑貴溪人由吏材任通政司知事擢黃巖令累官至御史陞浙江叅政卒於官柩還縞素泣送者不下

數百人復像祀之從子祺由鄉舉歷官處州守

同上

江永洪貴溪人由茂才舉授監利丞天性廉介不以私干人人亦不敢干以私嘗以次往述職民恐遂代也爭遮留之居六年坐註誤引去人咸惋惜子憲孫左曾玄孫潮汝璧汝珪相繼起科第

人物志

吳德祥弋陽人六歲喪父家貧比葬以衣裹小石周埋墳麓令異日可尋年十三值兵變隨母胡氏轉徙母卒哀毀幾絕繼父以徭被逮罪莫測德祥請代行人

或阻之德祥曰獲全此生以保吳氏祀繼父恩也報
生以死安所避之繫獄歲餘遇赦得歸

林志

胡濬鉛山人正統進士任刑部主事歷杭州知府公廉
有威不畏強禦屬邑富陽新城屢旱相視開渠築堤
引流灌溉滯獄悉為剖決治行第一受璽書文綺之
賚

人物志

黃溥字澄濟弋陽人正統進士擢御史歷任廣東四川
按察使所著有石崖集漫興集所編輯者則有策學

輯畧治世正音詩學權輿等書

林志

呂晟字景熙永豐人景泰進士由庶吉士歷官夔州知府柔順和樂以孝行稱於鄉里有司上其事詔旌門

安志

按安志載有上饒章敬思王庭槐永豐呂賢俱以孝義稱為附其名于此

高明字上達貴溪人景泰進士授御史聞內苑造龍舟上疏切諫徐州民訴有司於朝時例越訴者戍邊明

言戍邊防誣訴也今訴不誣法止當杖民為誣言者
吏貪功誣以謀反明按無反狀止坐誣言律皆報可
巡按河南黜屬吏六十人入總諸道章奏御史趙銘
等劾天下朝覲官觸上怒詰草疏主名明獨自承都
御史寇深言頻年章疏盡出明手幸勿以細故加罪
上意解石亨既誅童僕皆坐收明言不宜坐免者百人
憲宗立拜南京僉都御史揚州鹽盜起守兵失利詔
明討之造巨艦名曰籌亭往來江上督戰並江置邏

堡候望賊蹤跡無所匿遂平之仍還原任以親老乞終養歸上杭盜發詔起巡撫福建督兵往討擒誅首惡餘悉減死遣戍以上杭地接江西廣東盜易嘯聚請析置永定縣移疾竟歸久之卒

列卿錄

按高明歷官政蹟詳載何喬新所撰神道碑文生平著述甚多有愚軒糊壁南臺籌亭四集碑文所載者止終養征闡安宅三錄耳

鄭雅字仲平上饒人以監生調和鄉簿之官以一僕自

隨母與令長部使者爭不便面頸時時發赤繼判安
節奏蠲逋稅病革戒僕飭後具無受賄歸裝一弊篋
朝祭服外家訓十四條而已孫毅舉進士累官都御
史以治行聞

林志

費璠鉛山人天性孝友事親養志親歿謹廟祭雖遇遠
忌哀慕如初喪兄弟義居每食合諸房尊幼男女以
類聚一人弗至不食也子宏采既貴愈儉約自持常
語子姪曰吾先世慈祥謙約以有今日汝能守此則

慶社永延孝莫大焉鄉人有以關節請者懸束草於門謝之曰某若開口行囑即噬此草終其身無私干章楓山為之傳曰公之所立不出彛倫日用之常而各盡其所當為真足以為訓也

安志

劉伯川字東之永豐進士逆璫曹吉祥怙奪門功橫甚每朝會故為戲侮以市權糾儀者目攝之不敢言伯川舉笏披吉祥頰至流血朝儀肅然選額當授臺省郎當事者嫌其剛直抑除禹州守有惠政卒於官州

人祀之府志

江璞字伯溫貴溪人成化進士知南雄府器識英邁廢墜畢舉嘗創大中書院修太平橋上疏創通濟鎮居停客貨取資以代虛賦民蒙其惠祀於景德祠

廣東

名宦志

徐盈字子謙貴溪人進士守嘉興時常熟濬白茆江檄發郡丁數萬盈持曰白茆水患於吾郡差緩驅吾民遠役何忍耶移文助費不就徵發巡鹽御史行郡鞭

捷亭竈勒報鹽丁里胥乘機虐民盈爭之御史曰此
有往例盈曰例自公作亦自公止豈國憲耶獲止

浙

江名宦志

楊縉貴溪人由舉人令歸化時山寇竊發邑無城民輒
逃竄縉請於上官為築城鑿池民賴以安

福建名宦志

陳善弋陽人進士知安仁縣性清介嚴於治盜境內寧
息燬淫祠嘗以編戶逃亡重役累民奏減十五里為
七里民永懷之

湖廣名宦志

侯康遠字直夫弋陽人由薦舉授浙江建德令擢嘉興府同知清儉以帥奢俗有菜同知之謠尋請老歸卒

人物志

傅霖貴溪人由吏材任嘉善縣丞擢知東平州調濟寧陞保定知府為政不畏權要惟以愛民為心累著異績被旌典受知楊文貞公亟薦用之霖乃引疾歸

同上

費瑄鉛山人由進士歷官貴州叅議初以主事治水呂梁見上流有渠舊合芻土沿渠築隄隄恒潰民苦征

役乃募工改築石隄西則立壩以殺湍悍之勢東則

甃長衢以通牽挽之壅居民立廟祀之

林志

姚明字仲遠貴溪人由鄉薦選授御史按東吳改巡兩

浙平反冤獄無慮數十人擢陝西僉事督寧肅軍餉
舊法米銀限以一定明乃酌價之宜而上下之士卒

踴躍未幾以疾卒

人物志

按姚明林志以為成化間進士而登科考不載查
縣志明中景泰庚午舉人其子文灝乃成化甲辰

進士也

吳立字大本貴溪人由進士授刑部主事擢浙江僉事
所至鋤豪強植善良斥貪墨風采大著轉貴州副使
飭兵備屯田諸要害地越六載致仕

府志

畢瑜字珍廷貴溪人由進士選庶吉士歷官工刑二曹
以廷臣薦擢山東提學僉事文學操履推重於時子
濟川以春秋魁鄉會兩試仕終編修著有春秋會同

正蒙解諸集

林志

鄭祺字彥禧貴溪人以才德薦授壽光丞陞潁上令擢福建判民苦積逋他官嚴刑不能辨祺以誠感率爭先輸納尋謝事歸

人物志

江常字正倫貴溪人由太學生拜永興令永興有豪人侵奪民田常廉得實為追復之豪人因行賄當路厚誣常常歎曰本欲抑強扶弱以行直道今若此直道不可行矣棄官歸嘉靖初節推鄧尚義表常遺愛祀之鄉賢節推永興人去常去任蓋六十餘年矣

同上

婁諒字克貞上饒人少有志絕學聞吳與弼在臨川乃
往從之一日與弼治地召諒往視云學者須親細務
諒素豪邁由此折節雖掃除之事必身親之景泰四
年舉於鄉天順末選為成都訓導尋告歸閉門著書
成日錄四十卷三禮訂訛四十卷謂周禮皆天子之
禮為國禮儀禮皆公卿大夫士庶人之禮為家禮以
禮記為二經之傳分附各篇如冠禮附冠義之類不
可附各篇者各附一經之後不可附一經者總附二

經之後其為諸儒附會者以程子論黜之著春秋本
意十二篇不採三傳事實言是非必待三傳而後明
是春秋為棄書矣其學以收放心為居敬之門以何
思何慮勿忘勿助為居敬要旨後羅欽順謂其似禪

學云

白志

按吳康齋之門最著者陳石齋胡敬齋與婁一齋
三人而已同時所見已不能無異同不待整卷方
有貶辭也

王讓字謙光上饒人由進士授給事中屢觸忌諱不以禍福怵一時權貴深憚之里人懷忌相軋者因希風旨嗾鵬兒誣奏出補濟南通判再擢楚雄知府太傅黔國公以下重其素望咸咨以邊務焉平生章疏最多燬不存方擬大用以入覲過家而卒

同上

鄭節字從倫祺之子舉進士授南臺御史出按畿甸以風裁稱憲廟初進所為明良錄語頗觸諱賴優容得賜還構草峯書院講學於其中著禮傳八十卷續真

西山政經二卷發明朱子家禮作家禮畧二卷

同上

費宏字子充鉛山人甫冠舉成化進士第一授修撰弘治中遷左贊善進左諭德武宗立擢太常少卿預修孝宗實錄拜禮部侍郎進尚書帝耽於逸樂早朝日講俱廢宏請勤政務學納諫報聞劉忠致任命宏參預機務尋加太子太保武英殿大學士宸濠謀復護衛屯田輦白金巨萬徧賂朝貴錢寧及陸完主之中官特奏至閣宏極言不當予詔卒予之於是宸濠與

寧合而恚宏寧數傾宏事無所得以御史余珊嘗劾
案不當留翰林即指為宏罪中旨責陳狀宏乞休命
并案致仕甫發寧遣騎尾宏抵臨清焚其舟資裝盡
燬宏歸杜門謝客宸濠復求與通宏謝絕之益怒會
宏族人與邑奸人李鎮等訟宸濠陰令鎮賊宏鎮等
遂率衆攻費氏索宏不得執所與訟者支解之發宏
先人家毀其家宸濠敗言者爭請召宏世宗即位即
家起宏加少保入輔政宏持重識大體明習國家故

事與楊廷和蔣冕毛紀同心協贊及廷和等去位宏
為首輔委任甚至其於大禮不能強諫亦未嘗附離
而是時席書張璉桂萼用事由郎署入翰林驟至詹
事宏每示裁抑使不得擬他翰林璉萼大怨遂毀宏
於帝言宏納郎中陳九川所盜貢玉受尚書鄧璋賕
謀起用并及其居鄉事又因宏子懋良坐罪下吏攻
之益力復錄前後劾疏上之不得請則力求罷詆宏
尤切章數上宏亦連疏乞休致仕去璉遂以尚書大

學士入直內閣問一歲夢亦入矣夢既前死璉亦去
位帝始追念宏再遣行人即家起官自是眷遇益厚
宏亦竭誠無隱承璉夢操切之後易以寬和朝士皆
慕樂之未幾卒贈太保諡文憲宏三入內閣佐兩朝
殆十年中遭讒構訖以功名終

列卿錄

婁謙字克讓上饒人成化進士任御史嘗督南畿陝西
學政以躬行實踐為教士類風動時汪直新貴能禍
福人謙絕不與之接直銜之始遷校伺察竟莫間陞

四川布政使卒

林志

楊福字伯昌上饒人由監生拜藍山丞隣邑安仁衡山
民獠錯居告訐視藍滋甚歷幾官不能平部使因奪
其篆而以福署之既至不數月績用茂著將遷扶移
疾歸子麒舉進士累官南工部尚書譽望推重於世

人物志

費霖字子和宏之弟正德進士選庶吉士授編修時逆
濠陰蓄異志謀復護衛宏在內閣持不可霖娶同郡

婁姓之女濠妃之妹也故有連濠屢以意屬宋宋外
遜詞色而實陰折之濠因是切齒賂中貴出內批勸
其兄弟皆致仕乃益毒數於家門戶幾不保及濠叛
宋問道走贛州上書王公守仁謂先定洪州以覆其
巢穴扼上流以遏其歸路則成擒矣後卒如其策濠
敗後薦者誦言宏兄弟守正被禍詔還原職入侍講
筵預修武宗實錄成陞春坊贊善累官禮部尚書仍
兼學士掌詹事府事太廟成加太子少保數奉召入

西內賜直廬加少保卒贈光祿大夫諡文通

鈴山堂集

紀鏞字大器永豐吏授福建漳浦縣丞正德丁丑南靖
寇發命選有才幹者勦之鏞以膽力見用與賊交戰
斬首數千級賊潰乘勝抵巢穴因遇害贈承德郎漳
浦知縣錄其子理

林志

周福字慶鍾永豐人正統間布衣也自幼警敏涉獵書
史為文操筆立就信守金鉞會采英廟實錄辟福領
其事兼預輯郡乘一時名重文苑

人物志

李直字行裴貴溪人舉進士歷官以廉能稱猷明允
時權貴門達假匿名書陷以法賴公論直之調興化
判尋知保寧府列所宜行著為令後移疾歸卒於道
子祚舉進士嘗建白時政皆切中事宜歷陞僉事卒
同上

汪鳳字天瑞弋陽人舉進士歷任刑部郎中出知漳州
府會屬邑盜熾上官欲以叛聞鳳持不便卒以篡擒
之患撲而民不擾擢貴州叅政卒子俱虞部郎俊宗

伯偉吏部侍郎伯仲侍讀人以為積善之報云

同上

呂紳字天翰永豐人由進士授行人司陞刑科給事抗疏忤旨杖於朝瀕死黜歸劉瑾誅起雲南僉事終四

川副使

林志

姜綰字玉卿弋陽人成化進士由知縣擢南京御史弘治初劾守備中官蔣琮與小民爭利假公事以飭私情厥罪有十事下南京三法司既復特遣官覆治以奏謫判桂陽州判量移寧國同知遷慶遠知府討斬

劇賊韋七旋韋萬妙其黨糾衆數萬攻城綰堅守檄
民兵夾擊破走之東蘭諸州蠻悉歸侵地總督劉大
夏薦為右江兵備副使思恩知府岑濬逐田州知府
岑猛綰與都指揮金堂合諸路兵大破賊思恩平綰
條二府形勢請改設流官比中土廷議從之遷河南
按察使尋以疾歸卒於家

白志

姚文灝字秀夫成化進士授都水主事擢湖廣提學僉
事嘗自謂吾無他過人惟毀譽不入請託不行賄賂

不通而已官三載卒所著有學齋彙經說雜說中庸

本義

同上

邱鏞字宗周旭鑑子中進士累官右副都御史督漕運
巡撫鳳陽風望肅然左遷副使兵備漢中尋起僉都
御史莅巡撫事時漢中大旱便宜賑濟民賴以寧性
剛介知止謝病章再上得允忻然曰吾嘗以不能勇
退為憾今日乃釋重負矣

人物志

鄭齡字夢齡弋陽人登進士拜官工曹累陞四川左布

政使時劇寇野王剛作亂齡乃峙糗糧繕兵甲卒生擒之擢都御史巡撫河南振憲度察風俗禮賢愛民卓然中州之望卒於官

林志

李鏡字文明弋陽人舉進士授刑部主事黎文僖知其賢薦知岳州府築辰陵磯洩水壅田民深德之名曰

李公堤陞河南按察使轉浙江左布政使卒

懷麓堂集

葉元字本貞貴溪人由鄉貢累官知雲南府時廣西師宗州煽亂督師簡任以往元申軍法倡勇敢直擣賊

巢斬首數千級衆咸服曰老將不如也平生清苦勤

事卒官

人物志

周鵬字雲翔玉山人由進士官刑曹陞山東僉事尋改

汀漳兵備所在廉慎執法嘗平劇盜野王剛劉廷用

等後以不屈權貴謝事歸

同上

蔣濙字子川上饒人由進士歷官兵曹出知福州府境

內大治郡有靈濟宮例遣中官歲易時衣靡費供億

以萬計濙奏請以有司行禮罷遣中官

府志

王候字東之鳳之長子也由進士授青州府推官始莅郡或以年少易之視事數日連決疑獄衆皆駭服三年召入工曹陞郎中嘗監稅於杭督運於蜀視河決於張秋所在著聲以病告卒於途

同上

詹璽字廷信貴溪人由進士官部署轉遷藩臬三十年
數歷五省所至以廉謹稱

人物志

方仁字行恕弋陽人由進士官刑曹陞湖廣僉事澧州王府卒校持鈔貫強索市物藁葬已久有司莫敢問

仁捕得數十人悉發戍邊其害遂息

同上

呂環字景運永豐人成化間授嘉魚令改調新寧邑雜
彛苗負固不率逋官稅鉅萬琛至撫以恩信諸苗相

率服來輸後謝事歸

府志

周序字仲禮永豐人由進士歷禮兵二科給事中嘗疏
正君德圖治化八事多見采納陞太常寺丞卒於官

同上

李柰字景春上饒人舉進士歷官吏禮二曹淳博知大

體擢廣西叅政協贊兩廣軍務韓雍平徭之役柰與

有功焉

人物志

俞昆字佑英永豐人銳意性命之學學者稱裕齋先生
由歲貢授福安丞嘗上疏辨晰儒禪之異著尚書擬
講太極圖解皇明治化錄等書與吳康齋胡敬齋婁
一齋相友善時有湖東四齋之稱

同上

按俞昆府志作余未詳孰是

潘潤字德夫永豐人師事婁一齋謹佩其教終身出入

準繩矩李空同督學江右以人才為問諸生僉舉
潤空同致禮欲見之時方居憂以衰服拜於門下終
不肯見空同歎其知禮焚香靜坐時以所得者發為
吟詠終成都教諭

明儒學案

徐弘號希齋貴溪人家貧嗜學從胡敬齋遊敬齋取晦
菴行狀授之示以用功自小學近思錄始弘佩服訓
言日錄其言行以自考其事母若兄備極孝敬而於
克己為義尤汲汲焉

人物志

萬廣字廷介鉛山人由進士授太理寺評擢廣西僉事

清慎弗渝歷官十餘年無一錢尺帛為子孫遺

同上

夏鼎字汝梅貴溪人舉進士授嚴州府推官擢知臨清

州中貴人有脇取民貨者約令市肆日籍之以聞用

是勢少戢居踰年政譽日起俄遘疾卒

府志

李雲字自石貴溪人弘治進士擢侍御史出巡蘇松常

鎮所部肅然不敢犯尋謫節推泉州卒

同上

方崙號石山上饒人弘治進士授桐城知縣擢刑部主

事以釋寃獄忤璫瑾意解官歸里

同上

汪俊字抑之弋陽人舉弘治六年會試第一授庶吉士進編修與修孝宗實錄以不附劉瑾焦芳調南京工部員外郎瑾芳敗召復原官累遷侍讀學士擢禮部右侍郎轉吏部左侍郎時議興獻王尊號與尚書喬宇毛澄輩力爭澄引疾去代者羅欽順不至乃以俊為禮部尚書於時獻王已加帝號矣主事桂萼復請稱皇考章下廷議俊集廷臣七十有三人上議曰儀

禮傳為人後者孰後後大宗也漢宣起民間猶嗣孝
昭光武中興猶考孝元孰謂入繼之主與為人後者
異也武宗全神器授陛下何忍不繼其統今欲推尊
本生立廟大內不知出何典籍臣謹集諸章奏惟進
士張璉主事霍韜給事中熊浹與萼議同其他八十
餘疏二百五十餘人皆如臣等議議上留中而特旨
召桂萼張璉席書於南京復命集議後不得已乃請
加皇字以全徽稱議上復留中十餘日至三月朔乃

詔禮官加稱興獻帝為本生皇考恭穆獻皇帝擇日
祭告郊廟頒詔天下而別諭建室奉先殿側恭祀獻
皇俊等復力爭嚴旨切責而趣立廟益急俊等乃上
議請於安陸特建獻帝百世不遷之廟俟他日襲封
興王子孫世世獻饗陛下歲時遣官持節奉祀亦足
伸無窮至情矣帝終以與漢哀諸君不同命遵前旨
再議俊遂抗疏乞休明倫大典成落職卒於家隆慶
初贈少保諡文莊俊行誼修潔立朝光明端介學宗

洛閩學者稱石潭先生

列卿錄

汪偉字器之後之弟由庶吉士授檢討與俊皆忤劉瑾
調南京禮部主事瑾誅復故官屢遷南京國子祭酒
武宗以巡幸至率諸生請幸學不從俊罷官之歲偉
亦至吏部右侍郎偕廷臣數爭大禮又伏闕力爭及
席書張璁等大議猶持前說不變轉官左侍郎為陳
洸劾罷卒於家

同上

徐泓字本深貴溪人舉進士初授翰林檢討侍親王講

讀因論選事被劾除名後以薦擢四川叅政植松潘
寇擾轉督糗糧不乏尋以疾終

人物志

鄭毅字立之上饒人弘治進士累官至四川巡撫擢兩
淮總漕所在政聲赫奕為當時名宦著作甚富燬於

火僅存巖山詩集

同上

江潮字天信貴溪人以鄉試第一登進士知壽州累官
副都御史巡撫山西提督三關軍務會妖人李福達
惑衆聚黨震動三河潮捕急詭名入京匿武定侯郭

勛家因得流言宮闈上疑之時張永嘉新相欲結勛
自固乃阿旨下獄後釋歸

同上

祝濬字仲源玉山人由進士累官刑部郎中武宗南巡
上疏諫止杖幾死著有苦行集致仕居家卒之日無
以為殮

同上

李艾字子芳上饒人弘治進士選庶吉士授浙江道御
史會土官岑某以罪逮獄厚賂諸權貴免艾廉得
其情竟寘於法逆瑾怙勢率同列伏闕叩諫獲罪未

幾丁內艱歸

同上

夏瑛字潤甫玉山人弘治鄉舉仕醴陵令時賊劉齊寇湖湘瑛設方畧禦之闔境無虞用薦陞廬州馬政通判與印馬御史不合遂引疾歸

府志

丁洪字秀學鉛山人正德進士性行端介屢抗權貴歷官汀杭二州守母老乞歸養卒年八十一著有閑山

詩集

人物志

汪佃字有之俊弟正德進士歷官翰林院充經筵講官

與兄同以議禮不合左遷松江同知尋告歸嘉靖乙未大臣交章薦起官禮部郎中晉太常卿轉詹事府以疾乞歸不允卒於邸所著有東麓遺藁七十卷

同上

詹瀚字汝約玉山人由進士累官刑部郎中武宗南巡瀚同姪行人軾諫阻被杖軾死杖下而瀚得不死嘉靖甲申抗疏大禮再被杖直聲益振聞父疾求歸疏凡四上命未下輒行擢湖廣藩臬霍渭崖首薦之轉浙江左布政使拜都察院副都御史撫治鄖陽告

病歸家會漕河役興特召總理適妖賊猝起漸訓練
河夫俄頃擒之其應變之才如此漸侍從兩朝敷歷
中外幾四十年肅皇賜清修直節執法之臣二扁以
褒美之所著有比部集振美堂藁治河奏議

同上

詹軾字敬之玉山人由進士授行人正德丁丑上將南
巡軾抗疏極諫下獄廷杖死嘉靖初贈御史遣官諭
祭

林志

楊麒字仁甫上饒人正德進士歷官工部尚書積學能

文隨事輒辦嘗建盧溝橋今往來者德之

府志

邱九仞字時進祺之孫正德進士授石首令召拜南給事中屢因災異條陳皆關國體切民生凡議鹽法議糧解議機兵議立循環簿等事皆於數十年後悉見施行人以賈治安方之

同上

吳道南字宗甫貴溪人由正德舉人歷官兵部郎中會世宗幸承天道南為導嚴戒騎從所過吏民安堵擢山東副使緝海盜築海堤勤恤民隱以勞瘁卒

人物志

夏言字公謹貴溪人正德進士擢兵科給事中世宗嗣位疏請視朝後御文華殿閱章疏召閣臣面決帝嘉納之請改後宮負郭莊田為親蠶殿公系園遷兵科都給事中調吏科當是時帝銳意禮文事以天地合祀非禮欲分建二郊并日月而四言請分祀天地自是大蒙帝眷張孚敬頤指百寮無敢與抗者言獨不為下益以強直厚自結於帝遂擢少詹事兼翰林學士掌院事四郊工成進禮部左侍郎踰月代李時為

本部尚書去諫官未浹歲拜六卿前此未有也帝所
制作禮樂多言定之間臣李時翟鑾取充位帝每作
詩輒賜言悉酬和勒石以進帝益喜數召見諮政事
賜銀章一倂密封言事文曰學博才優初加太子太
保進少傅遂兼武英殿大學士入參機務李時卒言
為首輔加少師特進光祿大夫上柱國明世人臣無
有加上柱國者言所自擬也昭聖太后崩詔問太子
服制言報疏有譌字帝切責言言謝罪且乞還家治

疾特賜酒饌俾還私第治疾俟後命言雖在告閤事
多取裁決及建大享殿命中官高忠監視言不進勅
藁入直西苑諸臣帝皆令乘馬又賜香葉束髮巾用
皮帛為履言謂非人臣法服不受又獨乘腰輿帝積
數憾欲去言而嚴嵩因得乘機誣陷遂代其位未幾
河套議起言故慷慨以經濟自許因陝西總督曾銑
請復河套贊決之嵩揣知帝意力言河套不可復語
侵言言大懼謝罪以尚書致仕會有蜚語聞禁中謂

言去時怨謗嵩復代仇鸞草奏訐言納銑金交關為
奸利遂下銑詔獄嵩與崔元陸炳謀坐銑交結近侍
律斬遣官校逮言言抵通州聞銑所坐大驚墮車曰
噫吾死矣再疏訟寃帝不省獄成竟棄市時年六十
有七言豪邁有俊才與諸議禮貴人抗帝以為不黨
馴至大用及再入政府度前此與己角者皆不勝已
怨嵩不為防卒被陷以死言死嵩卒禍天下久乃多
惜言者隆慶初賜祭葬謚文愍言始無子妾有身妻

忌而嫁之生一子言死妻逆之歸貌甚類言且得官
矣忽病死言竟無後

列卿錄

按陳伯容甘露園集論文愍傳云文愍得罪世以
為簡傲不恭及其死也以為主復套分宜萑菲之
非也坐獻帝事耳初文愍以議南北郊議九廟稱
旨自青瑣拔擢驟登政府及獻帝配天稱宗祔廟
之議起天子以其章示文愍異文愍和之也文愍
噤不敢出一語至使分宜掠其美而定其議天子

心銜之矣故不旋踵而有稽緩勅稟之詰有不遵
用印記之詰有人閤晏晚禁內扛輿之詰小有過
差旋蒙譴責至於奪勛階追諭帖追印記削職勒
令還家而皆非其所以得罪之由最後主曾銑復
套分宜含沙立斬曾銑文愍相尾斬西市而亦非
其所以致死之由藏恨於彼飾怒於此耳何以知
之天子待他閣臣處他邊事不如是峻而峻繩文
愍適在配天諸議之後以此知之不爾雖文愍之

簡倨分宜之中傷不入也此段論文愍苦心處極得因附錄於此

夏尚樸字敦夫永豐人正德進士授南京禮部主事歲饑條上救荒數事再遷惠州知府投劾歸嘉靖初起山東提學副使擢南京太僕少卿與魏校湛若水輩日相講習言官劾大學士桂萼語連尚樸吏部尚書方獻夫白其無私尋引疾歸早年師婁諒傳主敬之學常言纔提起便是天理纔放下便是人欲魏校亟

稱之所著有中庸說語錄東巖文集

人物志

按夏尚樸學案作尚樸號東巖從婁一齋受康齋之學王文成贈以詩有舍瑟春風之句東巖荅曰孔門沂水春風景不出虞廷敬畏情蓋其學傳主敬故云爾至謂心所以窮理未足以盡理與陽明心即理也之旨顯然相背矣

原跋

李玘字孟玉山人正德進士授金華令有惠政章楓山常稱之陞工部主事轉刑部員外郎致仕歸家徒

壁立有司欲一見而不可得

同上

黃初字慎卿貴溪人舉進士一甲第二人終翰林院編修少穎敏博聞強記長乃志於理學其端緒得之吳康齋而卒深造之焉

同上

桂榮字君用上饒人以舉人歷官至監察御史按部四川摘發如神自旦至暮斷獄百宗立釋疑獄數十人一省以為神善詩歌古文辭有詩刻行世

府志

汪俸字克敬貴溪人嘉靖進士授刑部主事遷汀州守

擢閩憲副拜副都御史巡撫勛陽除興山保康之賊
立整堡於沙子嶺收武弁私卒申禁例以抑中官之
橫凡先後建白於汀有六議閩有六議楚有八議廣
西有平徭疏鄖有蠲租緩解疏皆於國計時艱稱碩
畫云

人物志

畢竟立字惟中貴溪人嘉靖鄉榜知化州時逆賊張璉
輩僭號改元割據五省竟立從征計擒諸僞將蕭雪
峰林胡曦徐東州等事聞受上賞由建寧同知轉陞

雷廉僉憲尋以採珠忤當道歸

同上

江以達字于順貴溪人嘉靖進士初授刑部主事典閩
試遷閩督學僉事楚督學副使會章聖梓宮南祔
顯陵三司出迎達居守以闕防門禁為楚藩所構逮
繫詔獄廷杖削籍節義文章並推重於時著有午坡
文集行世

同上

徐九思字子慎貴溪人嘉靖中孝廉授句容知縣為治
於單赤務加恩而御豪猾特嚴訟者扶不過十諸所

催科預為之期逾期令里老逮之而已隸莫敢至鄉
落縣東西通衢七十里九思節公費甃以石行旅便
之朝廷數遣中貴醺神三茅山縣民苦供億九思搜
故牒有鹽引金久貯於府者請以給賞民無所擾歲
侵穀踴貴巡撫發倉穀使平價糶而償直於官九思
曰彼糶者皆豪也貧民雖平價不能糶乃以時價糶
其半還直於官而以餘穀煮粥食餓者穀多則使稱
力分負以去其山谷遠者則就旁富人穀而官為償

之全活甚衆久之與應天府尹不合為巡撫所劾吏部尚書熊浹知其賢特留之積九載遷工部主事歷郎中治張秋河道漕河與鹽河近而不相接漕水溢則泛濫為田患九思議築減水橋於沙灣俾二水相通漕河溢則有所洩以入海而不侵田少則有所限而不至於涸工成遂為永利時工部尚書趙文華視師東南道河上九思不出迎遣一吏齎牒往謁會遷高州知府文華歸修九思怨與吏部尚書吳鵬合謀構

之遂坐九思老致仕句容民為建祠茅山九思家居

二十二年年八十五卒

白志

呂懷字汝德永豐人嘉靖進士選庶吉士遷於易遠近學者多宗之後改擢諫垣歷官國子司業太僕少卿致仕著有心統圖說傳於世學者稱為巾石先生

明儒

學案

徐樾字子直貴溪人嘉靖進士聞良知之學豁然解悟初仕禮曹累官雲南布政朝廷議討土蠻那鑑經年

不決撼忠義憤激遂自請兵以往遭奸臣李惟通賊洩謀被困死之詔贈光祿卿諭葬祭

同上

按徐樾受業於泰州王心齋學者稱波石先生

周法字直卿貴溪人幼岐嶷甫免於孩即能口誦書史比長受尚書於里人黃簡繼受大戴禮於畢進士裕補博士弟子員下帷益力四方士擔簦來學者日益親每一問難獵纓正襟危坐刺六經中語教愚導惑一一中肯竅非其人絕口不與語信州士瞿然稱學

府七赴省試不偶又不事生人產事父畢竭心力父
歿哀毀柴立母方孺人在嫠以哭幼兒故失明法所
夕承歡歲時蔬菓跽羞母母未嘗不敢入口母卒法
以未視含一語及淚淫淫承睫悲懣成疾竟不起以

子子明貴贈奉政大夫

郭青螺集

夏浚字惟明玉山人嘉靖進士授海鹽令歷官福建提
學副使尋轉溫處兵備時浙東海寇猖獗浚授方畧
鴟渚平陽慶元金磐相繼奏捷廣右狼兵驕悍浚殲

其渠魁軍紀震肅擢廣西叅政致仕歸家人物志

徐九經貴溪人嘉靖四十一年授政和縣丞壬戌倭寇

圍城與知縣周尚友堅守援絕城陷同死

福建名宦志

俞文明永豐人嘉靖舉人令清流嘉靖間流賊窺城潛

從東門龍津入縣將過半橋人民驚走文明挺身前

矛禦之賊不敢進邑賴以全

同上

周諒永豐人嘉靖舉人知寧遠縣凡五載前官逋負完

結者百三十有九事歲丙申大旱徒步拜禱雨隨澍

躬率鄉兵搗高山之巢穴立五營以益其險民賴之
江華苗發奉委勦捕巡撫陸獎異之後召補南京御
史湖廣名宦志

費元祿字無學鉛山人南太僕卿堯年之子費為故相
家又貴公子折節讀書為歌詩落筆數千言蘊義生
風傾慕賢士大夫如恐不及刻甲秀園集侑以好賄
問遺海內名士輪蹄舟楫交錯吳會閩楚間史稱鄭
莊置驛殆無以過屠長卿報詩云相思累寄蘼蕪草

見面難於優鉢花其推重如此

列朝詩集小傳

何天啓字義占貴溪人嘉靖舉人由諫垣謫丞遷令嘉善前此訟多停滯啓下車三日剖決無留勾攝不遣吏卒民無騷擾直歲潦力請蠲稅

浙江名宦志

徐上達字孔學號斗南永豐人由進士除嘉定令邑有豪右為民害上達下車即剪抑之因為所詆謀量移雞澤民苦馬政上達條其弊力請上官剔除未幾憂歸起知藁城復以狷直忤時左調叔白喟然曰是官

不薄鮑明遠嘗為之然吾木彊之性終不能易尋拂

衣歸所著有史記永吹萬鳴編藏於家

府志

葉鏜字汝聲上饒人由進士授庶吉士改刑科給事中

世宗朝言事稱旨命總理部事一時貴戚斂手尋擢

南少司寇晉秩尚書致仕歸

同上

楊時喬字宜遷上饒人嘉靖進士除工部主事推稅抗

州令商人自署所入輸之擢禮部員外郎遷南尚寶

丞萬歷初以養親去起南太僕丞移疾歸時喬雅無

意榮進再起再告闕十七年始薦起尚寶卿四遷南京太常卿疏請議建文帝諡祠祀死節諸臣就遷通政使秩滿連章乞休不允召拜吏部左侍郎邕直不及門及大計京朝官首輔沈一貫欲庇其所私憚時喬方正將令兵部尚書蕭大亨主之次輔沈鯉不可而止時喬乃與都御史溫純力鋤政府私人若給事中錢夢皋御史張似渠于永清輩咸在察中又以年例出給事中鍾兆斗於外一貫大愠密言於帝特留

夢臯已而盡留科道之被察者嚴旨責時喬等報復
夢臯既留遂合兆斗累疏攻純并侵時喬及純去時
喬歎曰主察者逐爭察者亦竄矣尚可覩顏與此乎
九疏引疾不得請時中外缺官多不補而羣臣省親
養病給假及建言詿誤被譴者充滿林下率不獲召
時喬乃備列三百餘人三疏請錄用復列上遷謫鄒
元標等九十六人削籍范雋等一百十人帝卒不省
明年大計外吏時喬堅辭不肯任有旨詰責乃再受

事一貫已罷言路爭擊其黨而李廷機者一貫教習門生也閣臣闕衆多推之惟給事中曹于汴宋一韓御史陳宗契持不可時喬卒從衆議時帝委時喬銓柄又不置右侍郎一人獨理部事銓叙平允然中朝議論方囂動見掣肘時喬官位未崇又自溫純去久不置都御史無以鎮壓百僚由是上下相凌紀綱日紊言路得收其柄時喬亦多委蛇主調停之畫議者諒其苦心不甚咎也秉銓凡五年最後起故尚書孫

丕揚未至而時喬卒篋餘一敝裘同列賻襚以殮詔

贈吏部尚書諡端潔

列卿錄

按楊時喬所著書其名不一孫承澤四朝人物考所載則有南關推事周易諸經全文古今字韻全書人物志所載又有大學古本書經四書古今訓解禹碑釋

徐易號豐溪永豐人嘉靖進士授鄞縣令開萬金湖築堰東西鄉凡三十二所渚洩唯時開募兵教水戰大

儲餉以養士卒亡何而海寇作人服其前識久之徵
為戶科給事中甫三月而卒

人物志

費懋文字民煥鉛山人嘉靖舉人授臨武令捕巨盜息
爭訟人士翕然歸化未幾致仕弟懋謙字民益襲廕
官南京都察院經歷負詩名兼工山水梅竹青溪社

集實為首倡

府志

周守愚字汝哲永豐人嘉靖進士令當塗徵拜南京刑
科給事中巡視京營劾論守備內監張宏洎兵部尚

書王文擅停園營操不法事宏實與江陵相表裏而
文其姻婭也張衡之出守愚僉事福建尋擢浙東副
使以疾告歸杜門十年卒

人物志

王建中字懋德上饒人生八月而父逝母毛氏和丸課
讀嘉靖甲辰領鄉薦知大理府抵郡即察滇俗之陋
有以同姓為婚者首厲禁之尋入覲解組歸卒年八
十五舉祀鄉賢有集行世

同上

裴化字子韞貴溪人嘉靖間任華亭縣漆木鎮巡檢倭

金史卷八十六
入寇化率兵禦死之華亭人像祀焉時政和縣丞徐

九經亦以城陷罵賊死

府志

鄭邦福字洪疇上饒人隆慶進士任刑曹郎奉使卹楚
囚補福建僉事遷粵東兵備時海氛方訖邦福至嚴
斥堠謹偵邏備禦有方人倚為重晉南回卿卒於道
所著有采真遊藁

人物志

徐貞明字孺東貴溪人父九思貞明舉隆慶進士知浙
江山陰縣徵為工科給事中累遷尚寶司丞初貞明

上水利軍班二議謂陝西河南故渠廢堰在在有之
山東諸泉引之率可成田而畿輔諸郡或支河所經
或澗泉自出皆足以資灌溉北人未習水利惟苦水
害不知水害未除正由水利未興也今誠於上流疏
渠濬溝引之灌田以殺水勢下流多開支河以泄橫
流其淀之最下者留以瀦水稍高者皆如南人築圩
之制則水利興水患亦除矣其議軍班則言東南民
素柔脆莫任遠戍今數千里勾軍離其骨肉而軍壯

出於戶丁幫解出於里甲每軍不下百金而軍非土著志不久安輒賂衛官求歸衛官利其賂且可以冒餉也因而縱之是困東南之民而實無補於軍政也宜倣匠班例軍戶應出軍者歲徵其錢而召募土著以足之便事皆下所司又著潞水客談凡十有四利譚綸見而美之謂其說必可行已而順天巡撫張國彥副使顧養謙行之薊州永平豐潤玉田皆有效乃進貞明少卿賜之勅令往會撫按諸臣勘議時御史

蘇瓚方奉命巡關復獻議曰治水與墾田相濟未有水不治而田可墾者畿輔為患之水莫如盧溝潯沁二河源遠流長又合深易濡泡沙滋諸水散入各淀而泉渠溪港悉注其中以故高橋白洋諸淀大者廣圍一二百里小亦四五十里每當夏秋淫潦膏腴變為瀉鹵菽麥化為萑葦甚可惜也今治水之策有三濬河以決水之壅疏渠以殺淀之勢撤曲防以均民之利而已帝並下貞明乃躬歷京東州縣相原隰度

土宜周覽水泉條列事宜以上戶部尚書畢鏘等力
贊之遂命貞明兼監察御史領墾田使有司撓者劾
治貞明乃先詣永平募南人為倡至明年二月已墾
至三萬九千餘畝又遍歷諸河窮源竟委將大行疏
濬而奄人勦戚之占閒田為業者恐水田興而已失
其利也爭言不便為蜚語聞於帝御史王之棟畿輔
人也遂言水田必不可行乃諭令停役而欲追罪建
議者用閣臣言而止貞明乃還故官尋乞假歸十八

年卒貞明識敏才練慨然有經世志京東水田實百
世利事初興而即為浮議所撓論者惜之

白志

汪蘭字子芳玉山人宋汪應辰後由歲貢授開化訓導
致仕居家以節義自勵嘉靖辛酉廣兵袁三從浙駐
玉蘭窺其將作亂往賊營諭以禍福賊已嘯聚迫之
行蘭正色曰死即死耳吾豈從若反乎罵不絕口被
殺

人物志

徐伯鳳字國祥貴溪人生平學尊朱子而以小學近思

錄為工夫讀書白鹿洞歸益精進每教人靜坐澄心
以觀清明之氣少時執母喪廬墓三年及司訓紹興
聞父訃跣行抵舍有雙鵲巢廬之祥人以為孝感所
致同上

吳學字原思玉山人有志濂洛關閩之學補邑庠生受
知於督學李崆峒嘗曰吳生程朱之流不可量也不
幸早卒所著有正義解井田圖擬古樂府諸藁同上

鄭以偉字子器上饒人萬曆進士授翰林院檢討典

子浙江鄉試戊午再典江南試未幾典武場會試奉
命冊封慧妃陪琉球國使蔡堅俱如禮歷吏部左侍
郎轉禮部尚書以講筵面叱逆璫上疏乞歸崇禎朝
入閣辦事時上每召對平臺劬瘁卒於位賜葬祭諡
文恪所著有靈山藏集行於世

四朝人物志

按鄭以偉所著有沍泥集

王夢陽號鰲磯上饒人由進士授安慶府推官時郡有
虎食人夢陽為文禱於神三日虎自斃

府志

詹士龍字見五永豐人由進士歷任漳泉海道不畏強禦斷還時相侵田相銜之命招撫海寇鄭芝龍聞者皆有難色卒奏績陞山陝左右藩時逆璫魏忠賢祠祀遍天下士龍獨不為建幾不免會閹敗晉南光祿卿授應天府尹尋謝政歸

人物志

夏子陽字鶴田玉山人由進士擢兵科給事奉命冊封琉球陞太常寺卿著有琉球錄所載山川風俗物產人民及所經屬國錯雜成文海國奇觀也

同上

黃清上饒人起吏員清勤積官嘉興府同知加四品服俸築海塘有功後以運同治高寶河堤積勞死于寶應之寧國寺蓋上官忌而擠之水以沒也至不能斂以病卒聞贈卹有加

湧幢小品

葉際英字仲華貴溪人萬曆舉人仕邵武令復補四川因土寇煽亂與楊總兵共討平之陞廣東雷州推官俗尚奢侈率之以儉年老致仕士民遮道不忍舍人物志

余桂萼號毓蟾萬厯舉人初為彭澤教諭遷孝感知縣
廉惠有聲遷巴州知州邑有寒士夏時亨者每夜讀
篝燈達旦桂萼出巡夜訪知其貧分俸助讀時亨果
成進士稱為知人在任四年移疾歸

府志

徐以德號裕元上饒人萬厯舉人歷官至四川叙馬瀘
兵備副使值奢崇明倡亂變起倉卒焚掠甚慘以德
百計綢繆練兵措餉設間招降凡五閱月州縣俱平
致政歸年八十餘卒

人物志

方應漸字養冲上饒人萬厯舉人遷隰州守轉山東濮
州先是妖賊王好賢徐鴻儒倡教白蓮餘孽禍山東
濮州為甚至則擇羈捕密授以計混賊中盡得其情
乃潛兵撲之前後俘八百餘人黨遂平未幾謝政歸

同上

董繼周號八際玉山人萬厯進士授海豐令尋擢刑部
郎居南部十載遷鄖陽守秩滿解組還家有八際山
房詩文集金魚社藁行世

府志

詹兆恒字月如永豐人崇禎進士授甌寧知縣民居失火延學宮兆恒奔煙焰中抱木主以出尋倡率重建徵授南京御史時賊陷含山犯無為兆恒疏劾總督高斗光明年秋又以賊陷廬州陳內外合防策再劾斗光請以史可法代斗光遂獲譴時江北民避亂盡走南京兆恒慮賊謀闖入處之城外為嚴保伍察非常奸宄無所匿福王立擢兆恒大理寺丞馬士英薦阮大鍼令冠帶陛見兆恒言先皇手定逆案十七年

間此輩日夕聚謀欲翻者數矣賴先皇神明獨斷堅
持不移今大仇未報忽召見大鉞還之冠帶豈不上
傷先皇之靈下短忠臣義士之氣哉疏奏命取逆案
進覽兆恒即上進而士英亦以是日進三朝要典大
鉞竟起用其秋兆恒進本寺少卿即請告歸唐王拜
兵部左侍郎佐黃道周協守廣信兵敗奔衢州之開
化縣歿於陣

白志

胡夢泰字友蠡鉛山人崇禎進士除奉化知縣邑人戴

澳官順天府丞怙勢不輸賦夢泰捕治其子其子急走京師懇澳令劾去夢泰澳念州民不當劾長吏而劫於其子姑出一疏言天下不治由守令貪污以陰詆夢泰及得旨令指實其子即欲許夢泰而澳念夢泰無可劾乃以嘉興推官文德翼平遙知縣王凝命實之給事中沈迅為兩人訴枉發澳隱情澳下詔獄除名夢泰聲益起吏部會廷臣舉天下賢能有司十人夢泰與焉行取入都畿輔州縣殘破上欲得廉能

治之諸行取者悉出補夢泰得唐縣京師陷南歸唐
王時授兵科給事中奉使旋里順治三年城破夫婦
俱縊死

同上

鄭爾說字鼎殷上饒人崇禎進士知建寧縣考最擬補
臺班以屏跡權門得工部主政首輔某黨同伐異爾
說特上章極論忤旨削職騎驢出都門後輔政以罪
歸用原官起補癸未請告還里澹於進取假館於德
興縣之南溪鄉為童子師者積二十年一日返衡門

途逢禦人刳衣笈將去審知爾說即慙謝請死其信

孚強暴若此

人物志

國朝

馮鏞字笙如永豐人順治乙未進士授黎城令擢戶部主政性介直不受請託出推蕪關通商裕課啟靈除奸尋陞員外郎再擢潁墅轉刑部郎中殫心勞瘁告

假回籍卒

人物志

潘大臺號望斗永豐人以明經任臨湘令時值湖南兵

燹之後繼以凶荒里巷蕭條民居瓦礫大臺至葺城
隍修學宮均田賦清驛遞適城中火災大臺泣禱願
以身代須臾返風滅火回署漏盡遽得疾卒其為湘
民死也如此

安志

查懋夔字敬泉鉛山人大海裔孫居家孝友閉戶讀書
不求聞達鵠湖書院久圯捐貲修葺葺邑人張時泰序
其事年八十有七舉鄉飲大賓子民敏克承家教隱
居蕉溪先人遺產悉推以讓兄弟縣令荆初揚作詩

美之孫繼尹明經候補學博

白志

周元字孟祥上饒人任雲南騰越副將吳逆叛署元偽總兵不就退居永昌

王師至蜀元與永昌偽將軍田進學偽總兵李鍾秀同謀反正鍾秀舉兵北勝元與進學舉兵永昌恢復順寧府雲龍州賊兵壓境衆寡不敵元被執不屈遇害

安志

徐光藩弋陽庠生避亂卜居晚溪鄉里以孝友稱兄弟

子姪約百口同居無異言

府志

祝雷聲字震默上饒人順治丁酉舉人生平端方古朴
不妄交與澹於營利專以著述自娛十三年閩變賊
逼以偽職遁跡獲免年九十三無疾而終

同上

花和仔弋陽人母姚氏為賊所執奮擲求死賊抽刀欲
殺之和仔前抱賊按其刃羣賊競斫之母子皆遇害

安志

江西通志卷八十六